

Untervazer Burgenverein Untervaz

Texte zur Dorfgeschichte von Untervaz



2022

Lebenslauf von Dorli Philipp

Email: dorfgeschichte@burgenverein-untervaz.ch. Weitere Texte zur Dorfgeschichte sind im Internet unter <http://www.burgenverein-untervaz.ch/dorfgeschichte> erhältlich. Beilagen der Jahresberichte „Anno Domini“ unter <http://www.burgenverein-untervaz.ch/annodomini>.



Lebenslauf von
Dorli Philipp
(16.06.1939 - 28.12.2022)

Lebenslauf von Dorli Philipp (16.06.1939 - 28.12.2022)

A churza Iblick ins Läba vom Dorli.

S Dorli isch am 16. Juni 1939 in Untervaz als 5. Kind vo ingesamt 7 gebora und Vaz isch au ihres Läba lang ihri Heimat blieba. Sie isch a Chrampferi gsi und hät immer meh als 100% geh. Seg das dihei ufem Buurehof, bim schaffa und spöter au um ihri 2 Kinder, d Helen und dr Silvio, guat dur s Läba z bringe. Do hät s Dorli zum Glück mitem Anni a gueti Ersatzmuetter gha, wo die Kind wie ihri eigne gliabt und behüetet hät.

S Dorli isch mitem Eifachshta z frieda gsi und für sie häts nid viel brucht zum glücklich si. Sie isch ganz a gsellici gsi und häts gärä luschtig gha, au wenn sies nid immer eifach gha hät im Läba. I jüngere Johr hät sie gärä tanzet und wenns passt hät, denn sind sicher immer 2 – 3 Jüz vom Dorli cho. Der Humor vom Dorli hät ma bis in Aargau kennt.

Förs Dorli hät ihri Tochter Helen a wichtigi Rolla gspielt. Dass d'Helen in Aargau ghürota hät, isch nid immer eifach gsi und d'Fahrt vo Niederwil uf Vaz isch nid immer ufem Plan gstanda, doch vo da Schualferia hät ma immer 1 – 2 Woche im Winkel verbrocht. Aber au im Aargau isch fürs Dorli immer as azogas Bett parat gstanda.

Nid nur bir Helen und bim Jörg dahei isch z Dorli a willkommna Gast gsi. Sie hät viel Fäscht mitprägt und ma hät sie kennt und möga.

A grossa Schicksalsschlag im Läba vom Dorli isch sicher der Tod vom Silvio gsi und miar werden nia verstoh, wieso das hät müessa si. Über das schwera Leid hän ihra sicher au d Helen und Familia gholfa. Ihri Enkel hän ihra immer viel Freud bereitet und sie isch unglaublich stolz gsi. Mit grossem Interesse hät sie alles was dia 4 abelangt mitverfolgt und a wichtiga Ereignis wia erschti Schuelbsüech oder Lehrabschluss teilgno. Au i spätera Johr isch dr Ustusch mit ihrna Enkel intensiv gsi. Im gemeinsame Enkelchat uf Whatsapp hät ma sich ustuscht und Fotena gschickt, ma hät mängmol mehrmols in dr Wucha telefoniert und wenn ma z Berg gange isch, hät d Nana immer müessa derbei si. Fürs Dorli sind ihri Enkel ihres Ein und Alles gsi, mit grossem Stolz hät sie au immer vo ihrna Allrounder gredet. Wo alles chönd und mit ihrem handwerkliche Gschick au immer s Hüslü of dr Alp pflegt und ufgwertet händ – so wies au dr Silvio gmacht hät.

Aber nid no s Dorli hät viel a ihrna Enkel gha. Tina, dr Reto, d Petra und dr Dario händ umgekehrt viel an der Nana gha und sie hät ihna sehr viel bedüdet. Mit dr Nana ischs eim nia langwilig gsi, sie hät gred wie ihra dr Schnabel gwachsa isch, sie isch fit gsi im Kopf und im Körper. Sie hät mit ihrem Tablet ohni Problem Spieli gmacht, Fotena in Status tua und fliessig Sprochnachrichta und Videos verschickt. Of dr Alp hät sie üs zeigtet wia ma Spriessali macht, mit dr Sägissa mäht, Müüs fangt und dasses au ned schlimm isch wenn ma barfuess ina Chuataischa oder a Distla dristoht. Jo, ufem Berg isch s Dorli am Liabschta gsi. Döt ufem Berg, z Vallils, wo s Dorli und s Anni au noch dr Pensionierig vom Dorli mängmol wochewiis Ziit verbrocht händ und nia ins Dorf ahi cho sind. Für was au? Dia Liabi und Freud am Berg und am Hüslü hät s Dorli ihrna Enkel welle witergeh.

Und das isch ihra glunga. Bis im Alter vo 82 chama säga, ischs Dorli immer fit gsi und sie hät näba as paar chlina Altersgebrecha nie gross gsundheitlichi Problem gha. Noch ihrem erschta Hirnschlag Mitti 2022 hät sie sich mit dr REHA wieder guet erholt. Sie hät au i dära Situation kämpft und nid ufgeh. Kurz vor Wiehnachte 2022 hät s Dorli denn ihra zweit Hirnschlag gha, leider mit Ableger im Chopf und dr Diagnosa uf kei Heilig. D Familie isch dankbar, dass dia Zyt im Spital nid lang duuret hät und sie im Chreis vor Familie am 28. Dezember friedlich hät dörfa ischlofa. So isch sie ihrer Schwöster Uti gfolgt, wo Mitti Johr gstorba isch. Uf dr palliativ Abteilig im Spital Fontana in Chur hät sich s Dorli in dära churza Zyt sehr guat ufghoba und wohl gfühlt.

En grossa Dank gilt am ganze Pfl egeteam, wo s Dorli dia letschtä Täg in ihrem Läba begleitet und betreut hän. A speziella Dank au an Luzi und d Brigitte wo immer fürs Dorli do gsi sin, segs zum poschta oder am Schluss für Arzttermine oder eifach churz zum luega wias goht.

Dorli, du hinderlosch a grossi Lücka und du wirsch no mängem fähla. Din Schalk und dini ufgstellt Art, wenn ma di nüma gseht ufem Fäld dussa laufa oder wenns im Status kei Wolkabilder me hät.

Liabi Mama, liabi Nana – miar danked diar für alles. Du wirsch immer in üserna Herza witerläba. Miar werden dich nia vergässa!